

Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piumasaqaatit il.il. pillugit Namminersorlutik Oqartussat nalunaarutaat

Aningaasanoorutit ilaannit iluanaarutinit agguassisarneq pillugu Inatsisartut inatsisaanni nr. 10, 22. november 2011-meersumi § 8, imm. 1-4 naapertorlugu, aalajangersarneqarpoq:

Kapitali 1

Tamanut iluaqutaasussamik siunertat

§ 1. Tamanut iluaqutaasussamik siunertaq imatut paasineqassaaq tassaasoq, ingerlatsineq qinnuteqartunut amerlasuunut, peqataasussanut innuttaasunullu nalinginnaasumik iluaqutaasussaq.

§ 2. Tamanut iluaqutaasussamik siunertat inatsisitigut aalajangersakkat ima paasineqassapput tassaasut, timersornerit tamanit peqataaffigineqarsinnaasut, innarluutillit utoqqaallu timersorneri ilanngullugit, piukkunnaatillit pikkorinnerillu timersorneri aamma meeqqat inuusuttullu peqatigiiffii, tak. §§ 4-6.

§ 3. Tamanut iluaqutaasussamik siunertat allat imatut paasineqassapput tassaasut, siunertat kulturimut tunngasut, siunertat inunnik qaammarsaanermut tunngasut, siunertat nappaatinik akiuiniarnermut pinaveersaartitsinermullu tunngasut, siunertat inooqatigiinnermut tunngasut, siunertat silami sammisaqartitsinermut tunngasut aamma siunertat tamanut iluaqutaasussamik ilisimatusarnermut tunngasut.

Kapitali 2

Tamanut iluaqutaasussamik siunertanut inatsisitigut aalajangersakkanut tapiissutit

§ 4. Timersorneq tamanit peqataaffigineqarsinnaasoq paasineqassaaq tassaasoq timersornerup ilaa, timersortartut pikkorinnerit naammassisartagaannit unammisarnerannillu allaanerusunik imaqartoq.

§ 5. Piukkunnaatillit pikkorissullu timersornerat paasineqassaaq tassaasoq timersornerup ilaa, peqatigiiffinni iligiit toqqakkat, nunami timersortartut pikkorinnerpaat, nunanut allanut unammisartut nunallu tamat akornanni unamminernut peqataasartut ingerlassaat.

§ 6. Meeqqat inuusuttullu peqatigiiffii paasineqassapput tassaasut, peqatigiiffii ilaasortat akiliuteqartartut minnerpaamik affaasa 30-t inorlugit ukioqarlutik ilaasortaaffigisaat.

§ 7. Tamanut iluaqutaasussamik siunertanut inatsisitigut aalajangersakkanut tapiissutit, aningaasanoorutit ilaannit iluanaarutinit agguassisarneq pillugu Inatsisartut Inatsisaanni tamanna pillugu aalajangersakkat naapertorlugit tunniunneqartassapput.

Imm. 2. Tamanut iluaqutaasussamik siunertanut inatsisitigut aalajangersakkanut tapiissutit killilimmik annertussuseqartumik paasissutissiinermik aamma allaffissornermik siunertanut atorineqarsinnaapput.

Kapitali 3

Siunertanut tamanut iluaqutaasussanut allanut tapiissutit

Tapeeriaatsit

§ 8. Tapiissutit suliniutinut tapiissutitut aamma ingerlatsinermut tapiissutitut tunniunneqarsinnaapput.

Imm. 2. Kultureqarnermut Naalakkersuisoq tapiissutisinissamut piumasaqaatinik ilanngussaqaarsinnaavoq.

Suliniutinut tapiissutit

§ 9. Suliniutinut tapiissutit paasineqassapput tassaasut, ingerlassamut piffissami killilimmi ingerlanneqartussamut aamma aalajangersimasumik anguniagalimmut naggataatigulluunniit angusaqarfiusussamut tapiissutit.

Imm. 2. Tapiissutit annertussusiat tassaavoq missingersuutip tapiiffigineqarsinnaasup 75 %-ia angullugu. Taamaattorli annerpaamik 200.000 koruunit akuersissutigineqarsinnaapput.

Imm. 3. Suliniuteqarfinnut naalakkersuinikkut salliutinneqartunut imm. 2-mi, naggatit aappaanni taaneqartumit qaffasinnerusunik tapiisoqarsinnaavoq. Suliniuteqarfiit suut qaqugukkulluunniit naalakkersuinikkut salliutinneqarnersut nittartagaq www.naalakkersuisut.gl aqutugalugu Kultureqarnermut Naalakkersuisup tamanut saqqummiutissavai.

Ingerlatsinermut tapiissutit

§ 10. Ingerlatsinermut tapiissutit paasineqassapput tassaasut, sammisarisamik ingerlatsinermut ingerlaavartumik aningaasartuutit matussusernissaannut tapiissutit, tamatumunnga ilanngullugit atorfeqartitanut, sulisorisanut, ininut allaffissornermullu aningaasartuutit.

Imm. 2. 90.000 koruunit angullugit tapiisoqarsinnaavoq.

Imm. 3. Suliniuteqarfinnut naalakkersuinikkut salliutinneqartunut qaffasinnerusunik tapiissuteqartoqarsinnaavoq imm. 2-mi eqqaaneqartunut sanilliullugu, taamaattoq qaffasinnerpaamik ukiumut 500.000 kr.-inik. Kultureqarnermut Naalakkersuisup nittartakkami www.naalakkersuisut.gl tamanut saqqummiuttassavai piffissami pineqartumi suut salliutinneqarnersut.

Tapiiffigineqarsinnaanermut piumasaqaatit

§ 11. Inunnut nunami maani najugaqartunut imaluunniit peqatigiiffinnut, kattuffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

Imm. 2. Kattuffinnut peqatigiiffinnullu qulit ataallugit akiliisartunik ilaasortalinnut tapiisoqarsinnaanngilaq.

Imm. 3. Ingerlatsineranut tapit taamaallaat tunniunneqarsinnaapput nuna tamakkerlugu peqatigiiffinnut kattuffinnullu.

§ 12. Tapiissutitik qinnuteqaatit imarissavai, ingerlatassap tapiiffigeqqullugu qinnutigisap allaaserinera, tamatumunnga ilanngullugit suliniutinut tapiissutit imaluunniit ingerlatsineranut tapiissutit pineqarnersut.

Imm. 2. Qinnuteqaammut isertitassanut aningaasartuutissanullu missingersuut aamma ingerlanniakkap aningaasalersornissaanut pilersaarut ilanngunneqassapput.

Imm. 3. Suliniutinut tapiissutitik qinnuteqaammut aammattaaq makkununnga uppersaait ilanngunneqassapput:

1) suliniutit allaaserinera naapertorlugu inunnit suliniutit piviusunngortinnissaanut pingaaruteqartunit peqataaniarluni akuersissutit aamma

2) suliniutit allaaserinera naapertorlugu init atortullu atorineqartussat atorineqarsinnaanerannut uppersaait.

Imm. 4. Peqatigiiffit kattuffiillu malittarisassat akuerisat aamma ilaasortanut akileraasunut uppersaait ilanngutissavaat.

§ 13. Kultureqarnermut Naalakkersuisoq siunertanut tamanut iluaqutaasussamik ilisimatusarnermut tunngasunut tapiissutitik qinnuteqaatit pillugit erseqqinnerusunik aalajangersaasinnaavoq, aamma qinnuteqaatinut taamaattunut tunngatillugu qinnuteqaatit kingusinnerpaamik tunniunneqarfissaat pillugu erseqqinnerusumik Naalakkersuisoq immikkut aalajangersaasinnaavoq.

§ 14. Suliniutinut tapiissutit, suliniutinut qinnuteqarnermiit ukiut tallimat iluanni naammassineqartussanut tunniunneqarsinnaapput.

§ 15. Ingerlatsineranut tapiissutit annerpaamik ukiut ataasiakkaarlugit akuersissutigineqarsinnaapput.

Imm. 2. Tapiissutit ukiut tamaasa qinnutigeqqinneqarsinnaapput.

§ 16. Makkununnga tapiissuteqartoqarsinnaanngilaq:

1) Tamanut iluaqutaasussamik siunertanut inatsisitigut aalajangersakkanut, tak. § 2.

2) Sulinngiffeqarluni angalanernut, paasisassarsiorluni angalanernut, ilisimasassarsiornermut ilinniarnernullu.

3) Angalanernut pikkorissarnernullu sulisitsisumit akilernerqartussatut ilimagineqartunut.

4) Sakkuutitik/nipilersuutitik, hardwarenik aamma softwarenik, atortussanik sakkussanillu pisinernut.

5) Eqqugassanut.

6) Nutaanik sanaartukkanut nutarterinernullu.

7) Niuernermut atasumik nioqqutissianut, atuakkanik naqiterineq eqqaassanngikkaanni, taamaattoq tak.

nr. 15.

- 8) Ingerlatanut, qinnuteqartup nalinginnaasumik missingersuutaasa iluanni akilerneqarsinnaasutut naatsorsuutigineqartunut.
- 9) Ingerlatanut, inatsit alla naapertorlugu qinnuteqartumut isumagisassaataareersunut.
- 10) Ingerlatanut, qinnuteqarnissamut killigigitap nallernerani aallartinneqareersimasunut.
- 11) Amigartoorutitik matussusiinermut.
- 12) Nittartakkanik pilersitsinermut ingerlatsinermullu.
- 13) Aaqqissuussinernut imaluunniit aaqqissuussinerit ilaannut, ingerlatsinerup ilaatut immiaaqqanik, viinnit imaluunniit imigassamik sassaalliinertalinnut, imaluunniit ingerlatamut atatillugu imigassanik tuniniaaffiusunut.
- 14) Katersuiniarnernut.
- 15) Qinnuteqartup nammineq naqiterivianit saqqummersitanut.
- 16) Saqqummersitseqqinnernut, atuakkat cd-llu ilanngullugit.

§ 17. Tapiissutit akuersissutigineqartut, siunertanut ingerlatsinernullu tapiiffigeqqullugit qinnutigineqartunit allaanernut atorineqarsinnaanngillat.

Qinnuteqarnermi periutsit

§ 18. Tapiiffigineqarnissamik qinnuteqaat aningaasartuutissanut isertitassanullu missingersuutitik aamma aningaasalersuinissamik pilersaarummik ilaqartinneqartoq kultureqarnermut Naalakkersuisup elektroniskimik immersugassiaa atorlugu ilusilersorneqassaaq, tamatumalu kingorna elektroniskimik Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmut nassiunneqarluni.

Imm. 2. Suliniutinut tapiissutitik aamma ingerlatsinermut tapiissutitik qinnuteqaatit tamarmik immikkut suliarineqarlutik nassiunneqassapput.

§ 19. Suliniutinut tapiissutit ukiumut sisamariarluni qinnutigineqarsinnaapput.

Imm. 2. Ullut kingusinnerpaamik qinnuteqarfissat aalajangiunneqarput tassaasut 15. februar, 15. april, 15. september aamma 15. november.

§ 20. Ingerlatsinermut tapiissutit ukiumut ataasiarluni qinnutigineqarsinnaapput.

Imm. 2. Ulloq kingusinnerpaamik qinnuteqarfissaaq aalajangiunneqarpoq tassaasoq 1. december, taamaattoq tak. § 29, imm. 2.

Naatsorsuutit kukkunersuinerlu

§ 21. Suliniutinut tapiissutitik tigusaqartup, suliniutip naammassineraniit kingusinnerpaamik qaammatit pingasut qaangiunneranni tapiissutit atornerannut naatsorsuutit atsiukkat Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmut nassiutissavai.

Imm. 2. Minnerpaamik 150.000 koruunit tapiissutigineqarsimappata, naatsorsuutit kukkunersuisumit

naalagaaffimmit akuerisaasumit imaluunniit kukkundersiuisutut nalunaarsukkamit kukkundersiorneqarsimassapput.

§ 22. Kukundersiueq ingerlanneqassaaq kukundersiuermi ileqqut pitsaasut naapertorlugit.

Imm. 2. Kukundersiuermi ilaatigut makku misissoqqinneqassapput:

- 1) Suliniutip naatsorsuutai eqqortuunersut pingaarutilinnillu kukkuneqaratillu amigaateqannginnersut.
- 2) Tapiissuteqarnermut piumasaqaataasut naammassineqarsimanersut.
- 3) Tapiissutit siunertarineqartumut atorneqarsimanersut.
- 4) Tapiissutitik tigusaqartoq aningaasaqarnermut tunngatillugu pisussaaffinnik mianerinnessimanersaq.
- 5) Paasissutissat, tapiissutitik tigusaqartup suliniummut tunngatillugu Naalakkersuisunut nalunaarutigisimasai uppersaatissaqarnersut.

Imm. 3. Ilinniartitaanermut, Kultureqarnermut, ilisimatusarnermut Ilageeqarnermullu Naalakkersuisoqarfiup taamungaannaq tigooqqaalluni misiliinikkut naatsorsuutit misissussavai.

§ 23. Suliniutinut tapiissutinut 150.000 koruunit ataallugit annertussusilinnut tunngatillugu kukkundersiuisoqassanngilaq. Naatsorsuutit tapiissutitik tiguisup atsiorsimasai naammapput. Tapiissutitik tiguisup atsiornermigut uppersassavaa, naatsorsuutit eqqortuusut, tapiissutitik tiguisoq aningaasaqarnermut tunngatillugu pisussaaffinnik mianerinnessimasoq aamma tapiissutit siunertamut atorneqarsimasut.

Imm. 2. Suliniutinut 150.000 koruunit ataallugit tapiissutitik tigusaqartoq, tapiissuteqartumit allamit imaluunniit tapiissuteqartartunit allanit tapiissutisisimaguni, tamanna pillugu uppersaammik Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmut nassiussissaaq.

§ 24. Ingerlatsinermit tapiissutitik tigusaqartup, ukiumut naatsorsuutit inernerit aamma kukkundersiuisup nalunaarutaa atsiugaq Ilinniartitaanermut, Kultureqarnermut, ilisimatusarnermut Ilageeqarnermullu Naalakkersuisoqarfimmut nassutissavai, kingusinnerpaamik tapiissutit tunniunneqarneranniit ukiup tulliani 1. juni.

Imm. 2. Ukiumut naatsorsuutit kukkundersiuisumit naalagaaffimmit akuerisaasumit imaluunniit kukkundersiuisutut nalunaarsukkamit kukkundersiorneqarsimassapput. Kukundersiuermi § 22, imm. 2-mi, nr.1-5-imi piumasaqaatit allanneqartut kukkundersiuisup misileqqissavai.

§ 25. Suliniummut tapiissutitik tigusaqartup Sullissivik.gl-imi nalilersuinermit immersugassaq immersussavaa.

Imm. 2. Nalilersuinermit immersugaq Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmut nassiuunneqassaaq, kingusinnerpaamik ingerlassap tapiiffigineqartup naammassineranniit qaammatit 2 qaangiunneranni.

§ 26. Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup tapiissutitik tiguisoq qaqugukkulluunniit qinnuigisinnaavaat paasissutissanik ingerlassamut tapiiffigineqartumut attuumassuteqartunik nassiusseqqullugu.

§ 27. Suliniutitut aamma ingerlatsinermut tapiissutitut akuersissutigineqartut tamakkiisumik ilaannakortumilluunniit utertillugit akileqquneqarsinnaapput, imaattoqarpat:

- 1) Tapiiffigineqartup tapiiffigineqarnissamut piumasaqaataasut naammassisinnaajunnaarpagit.
- 2) Tapiiffigineqartup tapiissutitut akuersissutigineqartunut piumasaqaataajunnartut naammassinngippagit.
- 3) Qinnuteqartoq eqqunngitsunik paasissutissiisimappat.
- 4) Tapiiffigineqartup paasissutissat naapertuuttut, naatsorsuutit aamma nalilersuinermini immersugassaq ilanngullugit, nassiukkumangippagit.
- 5) Ingerlassaq tapiiffigineqartoq sinneqartooruteqarfiuppat.

§ 28. Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfup kikkut tapiissutit tigusaqarsimanersut, tapiissutitut akuersissutigineqartut annertussusaat tapiissutillu sumut akuersissutigineqarnerat www.naalakkersuitsut.gl aqqutigalugu tamanut saqqummiutissavaa.

Kapitali 4

Atortuulersinneqarfia aamma ikaarsaariarnermi aalajangersakkat

§ 29. Nalunaarut atuutilerpoq 15. maj 2020.

Imm. 2. Ingerlatsinermut tapiissutissanut qinnuteqaatit 2020-mut naalakkersuinikkut salliutinneqartumi suliaasaqarfimmi § 10, *imm. 3* naapertorlugu, tunniunneqarsimassapput kingusinnerpaamik ulloq 1. juli 2020.

Namminersorlutik Oqartussat, 11. maj 2020

Ane Lone Bagger

/

Karsten Peter Jensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut